

**PERATURAN MAJLIS TILAWAH AL-QURAN PERINGKAT NEGERI KELANTAN
MENGUNA PAKAI PERATURAN MAJLIS TILAWAH AL-QURAN PERINGKAT
KEBANGSAAN (PINDAAN 2016)**

BAHAGIAN 1

Nama dan pemakaian

1. Peraturan ini dinamakan Peraturan Majlis Tilawah Al-Quran Peringkat Negeri Kelantan.
2. Peraturan ini hanya terpakai bagi Majlis Tilawah Al-Quran Peringkat Negeri Kelantan yang dianjurkan oleh Kerajaan Negeri Kelantan.

Tafsiran

3. Dalam peraturan ini, tafsiran yang digunakan adalah seperti berikut:

“Majlis” ertinya Majlis Tilawah Al-Quran Peringkat Negeri Kelantan;

“Urus Setia” ertinya Urus Setia Majlis Tilawah Al-Quran Peringkat Negeri Kelantan;

“Jawatankuasa Induk” ertinya Jawatankuasa Induk Majlis Tilawah Al-Quran Peringkat Negeri Kelantan;

“Penganjur” ertinya agensi yang menguruskan Penganjuran Majlis Tilawah Al-Quran Peringkat Negeri Kelantan (MTQNK) iaitu Jabatan Hal Ehwal Agama Islam Negeri Kelantan (JAHEAIK); dan

“Jemaah Hakim” ertinya anggota-anggota yang dilantik oleh Jawatankuasa Induk untuk menghakimi MTQNK.

“Johan Menunggu” ertinya Johan MTQNK setahun sebelumnya.

BAHAGIAN II

PELAKSANAAN MAJLIS

Anjuran dan Kelolaan

4. MTQNK dianjurkan oleh Kerajaan Negeri Kelantan dan diuruskan oleh Jabatan Hal Ehwal Agama Islam Negeri Kelantan (JAHEAIK). Pelaksanaannya dikelolakan oleh sebuah jawatankuasa yang ditubuhkan, iaitu Jawatankuasa Induk Majlis Tilawah Al-Quran Peringkat Negeri Kelantan.

Keanggotaan Jawatankuasa Induk

5. Jawatankuasa Induk terdiri daripada keanggotaan seperti berikut:
 - a. Seorang Pengerusi;
 - b. Seorang Timbalan Pengerusi;
 - c. seorang setiausaha
 - d. Beberapa orang ahli yang mewakili Jabatan Kerajaan berkenaan yang dilantik oleh Pengerusi; dan
 - e. Beberapa orang ahli daripada kalangan orang perseorangan yang dilantik oleh Pengerusi berdasarkan pengalaman dan kemahiran dalam bidang tilawah al-Quran;
6. Jabatan Hal Ehwal Agama Islam Negeri Kelantan (JAHEAIK) menjadi urus setia kepada Jawatankuasa Induk.

Pelantikan Jawatankuasa Kecil/ Pelaksana/ Kerja

7. Jawatankuasa Induk berhak menubuhkan jawatankuasa-jawatankuasa di bawahnya bagi tujuan membantu pelaksanaan majlis.

Tarikh Dan Tempat Majlis Diadakan

8. Tarikh dan tempat MTQNK hendaklah ditentukan oleh Jawatankuasa Induk setiap tahun, manakala Majlis Tilawah Al-Quran Peringkat Negeri mestilah diadakan dalam tempoh sekurang-kurangnya sebulan sebelum MTQK diadakan

Pembahagian Hadiah

9. Hadiah kepada peserta diberikan mengikut bahagian, iaitu Bahagian Lelaki dan Bahagian Wanita.

- 10 Hadiah-hadiah utama berupa wang tunai beserta hadiah iringan diberikan kepada Johan, Naib Johan dan Tempat Ketiga atau kategori lain yang diputuskan oleh Jawatankuasa Induk MTQNK dari semasa ke semasa.
- 11 Setiap peserta yang tidak mendapat hadiah utama seperti di Para 10 akan diberi hadiah saguhati.
- 12 Setiap peserta yang mengambil bahagian akan diberi hadiah cenderahati dan sijil penyertaan.
- 13 Hadiah kepada pemenang utama dan peserta yang mengambil bahagian ditetapkan oleh Jawatankuasa Induk.

BAHAGIAN III

SYARAT-SYARAT PENYERTAAN

Peserta-peserta Majlis Tilawah

- 14 Peserta-peserta MTQNK terdiri daripada Qari dan Qariah seperti berikut:
 - a. Qari dan qariah yang mewakili jajahan-jajahan di Kelantan, iaitu johan Qari dan johan Qariah Majlis Tilawah Al-Quran Peringkat Jajahan; dan
 - b. Johan Menunggu Qari dan Qariah MTQNK

Syarat-syarat peserta

15. Beragama Islam.
16. Warganegara Malaysia.
17. Berusia 18 tahun dan ke atas pada tahun penyertaannya.
18. Sekiranya mana-mana jajahan tidak dapat menghantar wakilnya seperti di Para 14 A, seorang Qari dan Qariah lain bolehlah dicalonkan bagi mewakili jajahan berkenaan dengan syarat mendapat persetujuan Penganjur.
19. Peserta hendaklah merupakan anak kelahiran negeri yang diwakilnya berdasarkan sijil kelahiran/ kad pengenalan.

20. Bagi pemastautin (tempat tinggal/kerja/belajar), peserta hendaklah bermastautin di negeri yang diwakili sekurang-kurangnya satu tahun sebelum majlis diadakan dan mengekalkan penyertaan di negeri tersebut bagi tempoh tiga tahun berturut-turut sebelum berpindah ke negeri lain.
- Bagi kakitangan kerajaan/swasta/persendirian hendaklah mendapat pengesahan daripada majikan/Ketua Kampung/ Penghulu/Penggawa, manakala bagi pelajar hendaklah mendapat pengesahan daripada ketua institusi pengajian berkaitan.
- 21 Peserta yang menyertai lebih dari satu Majlis Tilawah Al-Quran Peringkat Jajahan dalam tahun yang sama tidak dibenarkan menyertai MTQNK.
- 22 Peserta yang menjadi johan di peringkat Negeri layak menjadi Johan Menunggu sekali sahaja. Selepas itu beliau hendaklah berehat satu tahun dari tarikh majlis terakhir yang disertainya dan boleh menyertai majlis berikutnya dengan melalui penyertaan Majlis Tilawah Al- Quran Peringkat Negeri.
- 23 Peserta yang menjadi johan di peringkat negeri secara berturut-turut layak menyertai MTQK hanya dua kali berturut-turut. Selepas itu beliau hendaklah berehat satu tahun dari tarikh majlis terakhir yang disertainya dan boleh menyertai majlis berikutnya melalui penyertaan terus Majlis Tilawah Al- Quran Peringkat Negeri.
- 24 Peserta tidak dibenarkan menyertai MTQNK selepas mendapat Johan dalam Majlis Tilawah Al-Quran Peringkat Antarabangsa.
- 25 Setiap peserta hendaklah mengisi borang penyertaan rasmi Penganjur dengan lengkap dan menyerahkan kepada Urus Setia (melalui Pejabat Tanah dan jajahan / Pejabat Agama Jajahan) berserta satu salinan kad pengenalan, salinan buku akaun bank dan dua (2) keping gambar terkini berukuran passport.
- 26 Penyertaan akan terbatal sekiranya mana-mana syarat di atas tidak dipatuhi

Peraturan Peserta

- 27 Peserta Qariah hendaklah tidak berada dalam keadaan uzur syar'i. Sekiranya Qariah itu uzur syar'i, maka bolehlah digantikan dengan Qariah yang menjadi naib johan atau berikutnya dalam Majlis Tilawah Al-Quran Peringkat Jajahan berkenaan dengan syarat mendapat persetujuan Penganjur.

- 28 Setiap peserta dikehendaki hadir dalam majlis pengundian bagi menentukan giliran membaca dan tidak boleh mewakilkannya kecuali dalam keadaan yang amat mustahak dan mendapat kebenaran daripada urus setia.
- 29 Setiap peserta hendaklah mengundi ayat dan dua jenis Taranum Wajib untuk dibaca pada waktu yang ditetapkan sekurang-kurangnya dua jam sebelum majlis dijalankan dan tidak boleh mewakilkannya.
- 30 Keputusan undian adalah muktamad. Peserta tidak dibenarkan sama sekali menukar giliran membaca atau ayat yang hendak dibaca selepas pengundian dibuat
- 31 Peserta yang tidak hadir dalam majlis pengundian atau membuat pertukaran selepas pengundian tanpa kebenaran Urus Setia boleh dibatalkan penyertaannya.
- 32 Peserta hendaklah berada di dewan majlis tilawah sekurang-kurangnya 30 minit sebelum majlis bermula.
- 33 Peserta yang ditetapkan giliran membaca hendaklah berada di ruang menunggu astaka 15 minit sebelum giliran membaca.
- 34 Peserta dikehendaki membaca bermula daripada ayat yang telah diundi dalam tempoh 10 minit. Pengiraan masa bermula dari bacaan *isti'azah*.
- 35 Qari hendaklah berpakaian baju kebangsaan lengkap manakala Qariah hendaklah berpakaian sopan dan menutup aurat ketika mempersembahkan bacaan, Majlis Perasmian Pembukaan, Majlis Penutupan dan Pengurniaan Hadiah. Peserta Qariah tidak dibenarkan memakai penutup muka/niqab/purdah semasa mempersembahkan bacaan dan semasa majlis penyampaian hadiah.
- 36 Setiap peserta hendaklah mematuhi semua arahan dan peraturan yang dikeluarkan oleh Penganjur dari semasa ke semasa.

BAHAGIAN IV

PERUJIAN DAN PENGHAKIMAN

Penentuan Ayat

- 37 Ayat-ayat yang akan dibaca oleh semua peserta dipilih oleh sebuah jawatankuasa yang ditubuhkan oleh Penganjur terdiri dari juzuk1 hingga juzuk 30 Al-Quran al-Karim.
- 38 Pemilihan ayat-ayat dan dua jenis Taranum Wajib yang ditetapkan kepada peserta ditentukan dengan cara undi, iaitu pada hari giliran peserta itu membaca.
- 39 Setiap peserta tidak dibenarkan menukar ayat-ayat yang telah ditetapkan melalui undian kepadanya.

Penentuan Tarikh Bacaan dan Bilangan Peserta

- 40 Pihak Penganjur berhak menentukan tarikh bacaan dan bilangan peserta yang membaca pada setiap malam.
- 41 MTQNK dihakimi oleh Jemaah Hakim yang terdiri Seperti berikut:
- a. Seorang Pengerusi Jemaah Hakim yang dilantik oleh YB Dato` Pengerusi Jawatankuasa Pembangunan Islam, Dakwah, Penerangan dan Hubungan seranta Negeri Kelantan selaku Pengerusi Jawatankuasa Induk Majlis Tilawah Al-Quran Peringkat negeri kelantan;
 - b. Seorang Timbalan Pengerusi yang dilantik oleh Pengerusi Jemaah Hakim;
 - c. Seorang Setiausaha yang dilantik oleh Pengerusi Jemaah Hakim; dan
 - d. Sekurang-kurangnya 8 orang Ahli Jemaah Hakim yang dilantik oleh Pengerusi Jemaah Hakim bagi mengadili bidang-bidang Tajwid, Taranum, Fasahah dan Suara

Urus Setia Jemaah Hakim

- 42 Jemaah Hakim dibantu oleh:
- a. Dua orang Jurukira;
 - b. Dua orang Penjaga Masa;
 - c. Seorang petugas mengedar, mengumpul dan menyusun borang permarkahan.
 - d. Seorang petugas mengendali paparan teks Al-Quran
- Semua petugas berkenaan dilantik oleh Urus Setia atas persetujuan pengerusi Jemaah Hakim

43 Tugas Pengerusi Jemaah Hakim

Pengerusi Jemaah Hakim bertanggungjawab mengatur dan mentadbir cara penghakiman yang lengkap dengan memastikan ia dijalankan secara penuh amanah dan rahsia. Di samping itu, beliau bertanggungjawab menguruskan perkara-perkara berikut:

- a. Memastikan penyediaan ayat-ayat pilihan, intisari ayat dan borang pemarkahan;
- b. Menentukan tarikh dan giliran peserta membaca dengan cara undi;
- c. Menentukan ayat-ayat dan dua jenis Taranum Wajib yang perlu dibaca berturut-turut oleh peserta dengan cara undian;
- d. Sentiasa berada ditempat penghakiman bagi memantau dan mengawasi perjalanan penghakiman;
- e. Hendaklah mempengerusikan mesyuarat Jemaah Hakim sebelum dan selepas majlis;
- f. Melantik hakim pengganti bagi hakim yang tidak dapat hadir;
- g. Menilai, mengesahkan dan menandatangani keputusan-keputusan yang telah dibuat oleh setiap ahli jemaah hakim
- h. Melantik beberapa orang pegawai petugas Urus Setia Jemaah Hakim bagi membantu kerja-kerja berkaitan Jawatankuasa Kehakiman.
- i. Mengisytiharkan keputusan Majlis Tilawah Al-Quran Peringkat Negeri (MTQNK);
dan
- j. Pengerusi boleh, menurut budi bicaranya membuat apa-apa pindaan terhadap mana-mana keputusan sekiranya difikirkan patut dan perlu dengan persetujuan Jemaah Hakim.

Tugas Hakim

- 44 Setiap hakim dikehendaki menghakimi bacaan peserta mengikut bahagian-bahagian yang ditetapkan oleh Pengerusi Jemaah Hakim kepadanya.

Kaedah Penghakiman

- 45 Jemaah Hakim hendaklah mengadakan satu kaedah penghakiman yang meliputi perkara-perkara berikut:
- a. Bahagian-bahagian penghakiman iaitu Tajwid, Taranum, Fasahah dan Suara;
 - b. Perkara-perkara yang perlu diberi perhatian dalam bidang-bidang penghakiman;
 - c. Kaedah pemakahan (pemotongan markah) termasuk borang permarkahan ;dan
 - d. Penentuan pemenang.

- 46 Jemaah Hakim berhak menentukan Kaedah Penghakiman di Para 45 dan boleh meminda serta membaikinya dari semasa ke semasa bagi tujuan penambahbaikan kaedah berkenaan. Kaedah tersebut dijadikan **Lampiran A** kepada peraturan ini.

BAHAGIAN V

PENUTUP

Kuasa Jawatankuasa Induk

- 47 Jawatankuasa Induk berkuasa membuat sebarang keputusan yang difikirkan wajar bagi perkara-perkara yang tercatat atau tidak tercatat dalam peraturan ini. Keputusan adalah muktamad.
- 48 Setiap peserta dikehendaki mematuhi Peraturan Majlis Tilawah Al-Quran Peringkat Negeri ini dan arahan-arahan lain yang dikeluarkan oleh Penganjur dari semasa ke semasa. Pihak Penganjur berhak membatalkan penyertaan peserta yang melanggar peraturan ini.

Tarikh Kuatkuasa

Peraturan ini berkuatkuasa mulai 1 Januari 2017.